

# Platform usahawan mahasiswa tampil idea

BERITA  
HARIAN

5/1/2017

p. 06

**Serdang:** Sebanyak 13 kumpulan usahawan dari universiti awam (UA), institusi pengajian tinggi swasta (IPTS) serta kolej komuniti berentap pada pertandingan Pitching Business Model Canvas (BMC) di Universiti Putra Malaysia (UPM), baru-baru ini.

Program anjuran Pusat Pembangunan Keusahawanan dan Kebolehpasaran Graduan (CEM) UPM dengan kerjasama Kementerian Pendidikan Tinggi (KPT) itu secara langsung menjadi platform untuk mahasiswa yang menjalankan perniagaan di kampus menampilkan idea bernas dan kreatif.

Pengarah CEM UPM, Dr Mass Hareeza Ali @ Hamid, berkata cabaran bertema 'Perniagaan Dalam Kampus' itu turut membuka peluang untuk mahasiswa memperluas bisnes diusahakan.

"Objektif pertandingan ialah melahirkan usahawan mahasiswa yang berdaya saing, selain mempertingkatkan dan memperkukuh jaringan perniagaan antara UA dengan IPTS.

"Penganjuran ini merupakan antara aktiviti sempena program Siswapreneur Putra@1Malaysia 2016 di UPM sebagai inisiatif menggalakkan budaya keusahawanan," katanya.

Pada pertandingan itu, kejuaraan menjadi milik kumpulan dari Uni-

versiti Malaya (UM) yang memperkenalkan produk Readpublic, sekali gus menerima hadiah wang tunai RM1,000, plak dan sijil.

## Hubungan strategik

Universiti Sains Malaysia (USM) yang memper-taruhkan Unistorage pula muncul naib johan dan membawa pulang RM800, manakala UPM bersama produk Esprima pula meraih tempat ketiga dengan memperoleh hadiah RM500, selain plak serta sijil.

Timbalan Naib Canselor (Hal Ehwal Pelajar dan Alumni) UPM, Prof Datuk Dr Mohammad Shatar Sabran, menyampaikan hadiah kepada pemenang pada Majlis Penutupan Siswapreneur Putra@1Malaysia 2016 yang disempurnakannya.

Dalam pada itu, Dr Mass Hareeza berkata, Siswapreneur Putra@1Malaysia 2016 adalah program kerjasama CEM, KPT serta Fakulti Ekonomi dan Pengurusan UPM bagi membentuk budaya keusahawanan, di samping meningkatkan hubungan strategik antara mahasiswa, universiti dan agensi.

"Usaha ini selari matlamat melahirkan graduan holistik, berciri keusahawanan dan seimbang dalam kedua-dua aspek akademik serta kemahiran," katanya.



**Antara produk dipamerkan** di gerai usahawan mahasiswa sempena program Siswapreneur Putra@1Malaysia.